



CENTRALNA/SREDIŠNJA HARMONIZACIJSKA JEDINICA  
ЦЕНТРАЛНА ХАРМОНИЗАЦИЈСКА ЈЕДИНИЦА

Broj: 03-1-02-4-63-1/26  
Sarajevo, 16.02.2026. godine

Na osnovu člana 61. stav (2) Zakona o upravi („Službeni glasnik BiH“ br. 32/02, 102/09 i 72/17), člana 33f. stav (2) tačka a), d), e), f) i h) Zakona o finansiranju institucija Bosne i Hercegovine („Službeni glasnik BiH“ br. 61/04, 49/09, 42/12, 87/12, 32/13 i 38/22), člana 4. stav (2) tačka c) i člana 7. Pravilnika za procjenu kvaliteta sistema finansijskog upravljanja i kontrole u institucijama Bosne i Hercegovine broj 03-1-02-2-103-2/22 od 5.4.2022. godine, direktor Centralne harmonizacijske jedinice Ministarstva finansija i trezora Bosne i Hercegovine, *donosi*

**GODIŠNJI PLAN  
POJEDINAČNE PROCJENE KVALITETA  
SISTEMA FINANSIJSKOG UPRAVLJANJA I KONTROLE  
U INSTITUCIJAMA BOSNE I HERCEGOVINE  
ZA 2026. GODINU**

**Član 1.  
(Opći podaci)**

- (1) Godišnjim planom pojedinačne procjene kvaliteta sistema finansijskog upravljanja i kontrole u institucijama Bosne i Hercegovine za 2026. godinu utvrđuju se:
  - ciljevi pojedinačne procjene sistema finansijskog upravljanja i kontrole (FUK-a),
  - institucije Bosne i Hercegovine u kojima će se vršiti pojedinačna procjena kvaliteta sistema FUK-a u 2026. godini,
  - odgovorne osobe za pojedinačnu procjenu kvaliteta sistema FUK-a u Centralnoj harmonizacijskoj jedinici Ministarstva finansija i trezora Bosne i Hercegovine (CHJ MFT BiH) i institucijama u kojima se provodi pojedinačna procjena kvaliteta sistema FUK-a,
  - način obavljanja pojedinačne procjene kvaliteta sistema finansijskog upravljanja i kontrole i
  - rokovi obavljanja pojedinačne procjene kvaliteta sistema FUK-a.
- (2) Procjena kvaliteta i vršenje analiza sastavni je dio provođenja sistema FUK-a u institucijama BiH radi njegovog razvoja, a u cilju pružanja javnih usluga što je moguće jednostavnije, brže i jeftinije uz osiguranje odgovarajućeg nivoa kvaliteta i u skladu sa zakonom.

## **Član 2.** **(Ciljevi pojedinačne procjene sistema FUK-a)**

Ciljevi pojedinačne procjene sistema FUK-a su:

- identifikacija prakse i utvrđivanje prioriteta za unapređenje FUK-a,
- praćenje efikasnosti procesa upravljanja rizicima i primjene internih kontrola,
- davanje preporuka i smjernica za unapređenje sistema FUK-a,
- praćenje realizacije mjera iz godišnjih akcionih planova za realizaciju strategije iz oblasti javnih internih finansijskih kontrola i
- izvještavanje Vijeća ministara BiH o stanju, napretku i planiranim mjerama za unapređenje sistema FUK-a u institucijama BiH.

## **Član 3.** **(Kriteriji)**

Kriteriji za izbor institucija BiH u kojima se obavlja pojedinačna procjena kvaliteta sistema FUK-a su:

- identificirani i procijenjeni rezidualni rizici utvrđeni u registru rizika u oblasti upravljanja javnim finansijama, javnim nabavkama, upravljanja ljudskim resursima, pravnim poslovima, informacionim tehnologijama i specifičnim poslovnim procesima institucije,
- identificirani i procijenjeni rizici u obavljanju poslova i pružanju javnih usluga upoređeni s raspoloživim budžetom, brojem zaposlenih, vrijednosti imovine i IT sistemima,
- informacije o slabostima u sistemu FUK-a sadržane u godišnjim izvještajima o sistemu finansijskog upravljanja i kontrole i revizorskim izvještajima ili drugim izvorima.

## **Član 4.** **(Provođenje pojedinačne procjene kvaliteta sistema FUK-a)**

CHJ MFT BiH će pojedinačnu procjenu kvaliteta FUK-a u 2026. godini provesti u sljedećim institucijama:

- Služba za zajedničke poslove institucija Bosne i Hercegovine,
- Agencija za sigurnost hrane Bosne i Hercegovine.

## **Član 5.** **(Provođenje pojedinačne procjene kvaliteta sistema FUK-a u Službi za zajedničke poslove institucija Bosne i Hercegovine)**

- (1) Služba za zajedničke poslove institucija Bosne i Hercegovine je u *PIFC* aplikaciji dokumentirala mapu poslovnih procesa i registar rizika.
- (2) Registar rizika Službe za zajedničke poslove institucija Bosne i Hercegovine sadrži rizike čija je procjena ukupne izloženosti riziku u rasponu od niskih do visokih rizika.

- (3) Budžet Službe za zajedničke poslove institucija Bosne i Hercegovine za 2025. godinu iznosio je 26.687.000 KM.
- (4) Broj zaposlenih u Službi za zajedničke poslove institucija Bosne i Hercegovine na dan 31.12.2025. godine je 497.

#### **Član 6.**

#### **(Provođenje pojedinačne procjene kvaliteta sistema FUK-a u Agenciji za sigurnost hrane Bosne i Hercegovine )**

- (1) Agencija za sigurnost hrane Bosne i Hercegovine je u PIFC aplikaciji dokumentirala mapu poslovnih procesa i registar rizika.
- (2) Registar rizika Agencije za sigurnost hrane Bosne i Hercegovine sadrži rizike čija je procjena ukupne izloženosti riziku u rasponu od niskih do srednjih rizika.
- (3) Budžet Agencije za sigurnost hrane Bosne i Hercegovine za 2025. godinu iznosio je 2.319.000 KM.
- (4) Broj zaposlenih u Agenciji za sigurnost hrane Bosne i Hercegovine na dan 31.12.2025. godine je 32.

#### **Član 7.**

#### **(Obaveze CHJ MFT BiH)**

- (1) CHJ MFT BiH će, u roku od najmanje petnaest radnih dana prije datuma predviđenog za početak obavljanja pojedinačne procjene kvaliteta sistema FUK-a, dostaviti pisano obavještenje institucijama iz člana 4. ovog godišnjeg plana o planiranoj pojedinačnoj procjeni kvaliteta sistema FUK-a.
- (2) Pisano obavještenje uključuje odluku o imenovanju osoba za obavljanje pojedinačne procjene kvaliteta sistema FUK-a i potpisanu izjavu o povjerljivosti podataka i informacija od strane osoba imenovanih za obavljanje pojedinačne procjene kvaliteta sistema FUK-a.

#### **Član 8.**

#### **(Obaveze imenovanih osoba za obavljanje pojedinačne procjene kvaliteta FUK-a)**

- (1) Pojedinačnu procjenu sistema FUK-a realizirat će zaposleni u Odsjeku za razvoj finansijskog upravljanja i kontrole CHJ MFT BiH koje posebnom odlukom imenuje direktor CHJ MFT BiH.
- (2) Osobe imenovane za obavljanje pojedinačne procjene kvaliteta sistema FUK-a moraju imati kompetencije i stručnost propisanu Pravilnikom za procjenu kvaliteta sistema finansijskog upravljanja i kontrole u institucijama Bosne i Hercegovine.

**Član 9.**  
**(Ovlaštenja i obaveze institucija u kojima se obavlja pojedinačna procjena)**

Rukovodioci institucija iz člana 4. imenovat će osobu iz svoje institucije koja će u procesu pojedinačne procjene kvaliteta sistema FUK-a biti odgovorna za komunikaciju s odgovornim osobama iz CHJ MFT BiH.

**Član 10.**  
**(Način i rokovi obavljanja pojedinačne procjene kvaliteta FUK-a)**

- (1) Pojedinačna procjena kvaliteta sistema FUK-a provodi se na osnovu podataka iz upitnika za pojedinačnu procjenu kvaliteta sistema finansijskog upravljanja i kontrole, podataka iz upitnika o samoprocjeni, analize podataka o rizicima i kontrolama unesenim u *PIFC* aplikaciju, izvještaja Ureda za reviziju institucija BiH, razgovora s rukovodstvom i zaposlenima radi dodatnih pojašnjenja, uvida u dokumentaciju (interni i eksterni izvještaji) i drugih materijala/izvora informacija, relevantnih za procjenu.
- (2) Institucije iz člana 4. ovog godišnjeg plana u obavezi su osobama koje provode pojedinačnu procjenu kvaliteta sistema FUK-a osigurati odgovore na dostavljene upitnike i uvid u traženu dokumentaciju.
- (3) Pojedinačna procjena sistema FUK-a bit će provedena u II, III i IV kvartalu 2026. godine.

**Član 11.**  
**(Izvještaj o provedenoj pojedinačnoj procjeni kvaliteta FUK-a)**

- (1) Izvještaj o provedenoj pojedinačnoj procjeni sistema FUK-a sadrži:
  - procjenu stepena razvoja po područjima procjene,
  - najznačajnija zapažanja po područjima procjene,
  - preporuke za unapređenje po područjima procjene,
  - opću procjenu stepena razvoja sistema FUK-a,
  - preporuke za razvoj kapaciteta za jačanje internih kontrola i
  - priloge u kojima je dokumentirana provedena pojedinačna procjena.
- (2) Izvještaj o provedenoj pojedinačnoj procjeni kvaliteta sistema FUK-a dostavlja se institucijama iz člana 4. ovog godišnjeg plana u roku od petnaest radnih dana od dana završetka pojedinačne procjene kvaliteta.
- (3) Izvještaj o izvršenoj pojedinačnoj procjeni kvaliteta sistema FUK-a potpisuju osobe imenovane za obavljanje pojedinačne procjene kvaliteta i direktor CHJ MFT BiH koji potpisom potvrđuje odobravanje izvještaja.
- (4) Institucije iz člana 4. ovog godišnjeg plana mogu dostaviti CHJ MFT BiH komentare na nacrt izvještaj o provedenoj pojedinačnoj procjeni kvaliteta sistema FUK-a ukoliko smatraju da su prilikom procjene i sastavljanja izvještaja učinjene materijalno značajne greške.
- (5) Za realizaciju preporuka iz izvještaja o provedenoj pojedinačnoj procjeni kvaliteta sistema FUK-a odgovorni su rukovodioci institucija u kojima je provedena pojedinačna procjena kvaliteta sistema FUK-a.

**Član 12.**  
**(Stupanje na snagu i objava)**

- (1) Godišnji plan pojedinačne procjene kvaliteta sistema FUK-a za 2026. godinu stupa na snagu danom donošenja.
- (2) Godišnji plan pojedinačne procjene kvaliteta sistema FUK-a u institucijama BiH za 2026. godinu objavljuje se na internet stranici CHJ MFT BiH <https://chj.mft.gov.ba>, odnosno na internet stranici Ministarstva finansija i trezora Bosne i Hercegovine [www.mft.gov.ba](http://www.mft.gov.ba) u dijelu koji se odnosi na CHJ MFT BiH.

**D I R E K T O R**

**Njegoš Pavlović, s.r.**

**Dostaviti:**

- Službi za zajedničke poslove institucija Bosne i Hercegovine,
- Agenciji za sigurnost hrane Bosne i Hercegovine,
- Odsjeku za razvoj finansijskog upravljanja i kontrole,
- internet stranica CHJ MFT BiH i
- a/a.